


لکایتہ شندویلا

مأمون کامل



الهيئة العامة لقصور الثقافة
إقليم شرق الدلتا الثقافي
فرع ثقافة الشرقية

تحت رعاية
عثمان فؤاد برعي
رئيس إقليم شرق الدلتا




رئيس مجلس الإدارة
والمشرف العام
فيصل المغازي
مدير فرع ثقافة الشرقية

هيئة التحرير
محمد عبد الله الهادي
د. عزت جاد
محمود ناصف

رئيس التحرير
إبراهيم عطيه
إشراف
سامي البلتاجي
مدير الشئون الثقافية

المراسلات ثقافة الشرقية ٢٢٢٥٦٧ / ٠٥٥



مفتتح

رسالة أردت أن تصل إلي
كل من أحببت فأشرت أن أكون
أمامهم كتاباً مفتوحاً
فكان هذا الكتاب



تسندويل رحلة حياة

يعد شعر العامية من أهم أنواع الكتابة الإبداعية ، لما يتمتع بمكانة خاصة في قلوب العامة من الناس ، المعبر عنهم في أفراحهم وأحزانهم ، بل والخاصة أيضا لما يحوي من أفكار ومعان تعطيه مذاقه .

ومنذ ظهور هذا الفن القولي نتيجة للتغيرات الاجتماعية والسياسية التي طرأت علي المجتمع وانفتاحه علي الثقافات الأخرى ، فاعلا ومتفاعلا مع ما يدور من أحداث ومتغيرات جعلت الوجدان الشعبي ينشد أناشيده النابعة من بيئته متأثرة ومؤثرة في أفراحه ، واستلهم النموذج الشعبي الذي يظهر مدى استفادة الشاعر ممن سبقوه مطوعا قدراته الفنية في الإبداع وانتاج نص شعري شعبي متضمنا حقائق وشاعرية لغة وصورا ، وطبيعة العلاقة بينه وبين الجمهور اعتمادا علي عنصر الشاعرية وأثره علي النفس في صورة راوي شعبي ذو قدرات خاصة .

أما الشاعر الشعبي فيختلف عن الراوي الشعبي من حيث القدرات الإبداعية الخلاقة التى تظهر ثقافته ، وتأثره بالمنتج الشعري لغيره ، وهضمه هضما جيدا ثم صياغته فى قالب نص شعري قريب الصلة بالمجتمع . متخذاً من مفردات أشخاصه وتعبيراتهم أداة لتشكيل عالمه ، وصياغته فى نسيج شعري بسيط ، يقترب من الشيوخ بين عامة الناس ، فيمس حواسهم ويترك أثره ، ويحقق الرسالة المنشودة من إنتاجه ، وإضفاء الطابع الملحمي للسيرة الشعبية على قصائدهم الشعرية .

وتعتبر قصيدة (حكاية شندويل) للشاعر مأمون كامل بمثابة سيرة شعبية مصغرة عن هذا البطل الفلاح (شندويل) الذى اتخذه الشاعر نموذجا للمصري الأصيل، المتمسك بتراب وطين الأرض .

ويطوع الشاعر إمكانياته وأدواته الفنية فى شكل قصيدة من (الشعر الحر) فى بعض المواضع القليلة لضرورات المعنى ، وقد يتفق بيتان أو ثلاثة فى القافية أما الشكل

السائد علي (حكاية شندويل) هو المربع ، كما هو معهود
فى بداية قص السيرة وهو عبارة عن بيتين من الشعر
يتكونان من أربع شطرات مستقلة ومتصلة فى ذات الوقت .

والمربع شكل فني من أشكال الفن القولي ، ويطلق عليه
(فن الواو) ويرتكز علي لعبة ارتطام القوافي ليتولد
المعني وتبرز الحكمة ، وهو ما اعتمد عليه الشاعر
المصري (أحمد بن عروس) ، واكتشف الفلاح المصرى
هذا القالب الفني القابل للتعبير عن مأساته وعجبه من فعل
الأيام .

ولم يشابه المربع فى إبداعه بين القوافي فقط بل واتخذ
فن الموالمولفا بين القوافي فى مواضع عدة من نسيج
العمل الفني وروايته علي أسس موضوعية وهي الرواية
بالمربع منذ البداية حيث يقول ...

نسمع حكاية جدع فلاح عشق أرضه
أرضه كمان عشقته حافظت علي عرضه
والعشق بينهم يا ليل علي عين مخليهم

لتنين تشوفهم تقول واحد عشق نفسه

هي دي قصة حكاية سندويل

فلاحظ اعتماد الشاعر علي تقنيات فن الرواية للملحمة
بالشعر في قالب قصصي استهلالي إيقاعي ، باللغة اليومية
الموحية ، المحملة بدلالات ومعان واضحة ومباشرة تنفذ
إلى العقل والوجدان ، واسترسال حالة القص التي تعطي
إنطباعاً بالثنائية أحياناً إلا أن هذا الشعور يتلاشي كلما نوع
الشاعر في نغماته الإيقاعية وقوافيه في شكل سلميات السلم
الموسيقي النابع من الشعبية ذات الجذور المصرية في
وصف ملامح البطل في لغة خفيفة موحية فيقول :

سندويل ده أصله واحد من ولاد آدم بيشقي

والغريبه

الشقا كان باختياره

فوق ما إنه ظروفه صعبة عشان يعيش بتقوله يتعب

فالشاعر يختار لغته مباشرة والحركة الإيقاعية في تآلف
وتؤمة بين الشعر واللغة ، تكثف المعاني وتحمل أبعد من

ألفاظها ، توحى بالسهولة والتعبير اليومي المؤلف لدي
عامّة الناس (شندويل ده أصله واحد من ولاد آدم بيشقي) .

وفى وصف شخصية شندويل يقرر حقيقة يلح عليها
الحاحا وهي صفة (العطاء) التي تميزه عن غيره (والعطا
فنه وكاره - العطا عنده حياه - والعطا عنده صلاه) .

واسترسل مأمون كامل حكاية شندويل فى توصيفه لهذا
الفلاح ابن الأرض الأصيل من خلال اعتماده علي المربع
الأعرج باستمرار لخلق نوع من التنعيم الشعري يقول :

إسم الأصيل شندويل بيته بساط أخضر

عنوانه بين البيوت عايق بيتمخطر

وحكايته بين الحكاوي عمدة الحكايات

تسمعا تعرف صحيح مين اللي يتقدر

كأنى بالشاعر يرتجل تراكيباته اللغوية وتعبيراته فى هذا
البناء الملحمي الذى اختاره فى تشكيل تجربته الشعرية فى
لغة عربية مصرية ذات جذور ريفية أصيلة ، نابغة من
غيطان قريته (نشوي) التى صاغ فيها قصيدة رصد

المتغيرات التي لحقت بالقرية المصرية لدرجة أنه تاه عنها
وراح يتساءل في حيرة (نشوي فين يا أهل نشوي ...؟!) .

وعندما يقترب الشاعر من الوجدان الشعبي يتخذ طريقته
في التعبير ، بالتدبر والحكمة التي لا يستطيع نفيها أحد
يقول :

والناس معادن يا عين ولكل معدن ناس

مين اللي قال الصفيح يلمع ويصبح ماس

مين اللي قال الذهب لوف التراب يرخص

مين اللي قال الأصيل هيجيله يوم ينداس .

فالشاعر يصيغ معاني متداولة في قالب من الحكمة
تقترب من صياغة ابن البلد في ثوب شعري محكم البناء
والتنسيق مستوحيا أصدااء شاعر بعيد استمع له يوما ولكن
يطوع آلياته الإبداعية في الرقي باللغة السائدة وتطويعها
بالجمل مضامين موحية مستوحاة من الموروث الشعبي ،
ويعيد صياغة تعبيراته بطبيعية تعطي إحساسا بالإرتجال
الذي يعتمد عليه الشاعر الشعبي في روايته للسيرة الهلالية

وغيرها مستدعيا أغراض الشعر من الوصف والفخر

عنصرا هاما مرتكزا علي القص يقول :-

ييجي الزمان ويروح وادي شندويل هواه

الشوره شورته وصوته جاي من جواه

فيه اللي يمشي يمين واللي شمال يمشي

وهوه رجله تروح مطرح م يرسى هواه

فاعتماد الشاعر علي المربع يتعلق بالاستطراد .

واستكمال المعنى السابق وتقديم معلومة جديدة تظهر تطور

الأحداث وتمهد للوصف فى بنية النص الشعري وهو ما

نلاحظه فى سيرة شندويل الفلاح المصري ، والعتب هو

الحكمة التي هي المفتاح الحقيقي يقول :

أرضي يا رحلة حياة بدايتها كان طينك

آخرها فيكي اندفن وأصبح أنا طينك

ندرن عليا يا غاليه بعد الحساب لارجع

أرويكي ثاني عرق وأسمع مواويلك

ويستمر الشاعر فى ممازجته بين الحكاية الشعبية
والسيرة مضمنا الموالم والأغنية فى نسيج النص المنتج
منوعا فى الضمائر بين الغائب والمخاطب بصورة مباشرة
والمتكلم أحيانا :

أرضي يا عود الريحان براويجه فواجه

أرضي يا قوت الزمان زراعته طراحه

ولاده زين الرجال يسقي الشقا مواويل

ومهما يتعب يقول : بعد التعب راحة

فالموروث الشعبي لدى الشاعر هو الأساس الذى يتكأ
عليه فى بناء عمله الإبداعي ، وعرضه المتنوع فى عفوية
بسيطة ، تشعر بالتلقائية والمباشرة فى كثير من المواضع
المبدوءة بالضمير مرتكزا على الجملة الأسمية فى بداية
المقطع واصفا حياة شندويل الذى تربى فى بيئة ريفية
فقيرة وهو مثل أى فلاح يتحدى دائما الصعاب لتحقيق ما
ينشده فى بناء وعمارة الكون وامتزاجه بالأرض فى صورة
بلاغية بسيطة وعميقة رغم مباشرتها .

" شوفوا أرضه ... هتشفوه

هوه هيه

هيه هوه

شاب أسمر لونه من لونها بيبرق "

فالشاعر يستمر فى سرد سيرة شندويل وما يميزه من صفات عن غيره ، وما ينفرد به عن سائر البشر ، متخذاً من عنصر التشخيص أداة فنية عارضا لما حدث من تغيرات اجتماعية ومحاولة لتشويه شندويل / الفلاح المصري ، وكشف الذات الوطنية وتعريضها سعيًا وراء عودة الوعي القومي والانتماء إلى الأرض ، صورة للفلاح فى الغيطان .

" شندويل بيتقول يا ليل

لما تلاغيه أرضه "

ويظهر علاقته مع الكائنات والأشياء المحيطة به مثل (مسعود) حماره و (الساقية) بتزغرد ، و (أبو قردان) فى لحظة غرس الشتايل (الشمس) وغيرها من مفردات .

ورغم كل المحن والصعاب يبقى شندويل رمزا للعطاء
والحب والخير والشاعر يستنكر ما يردده الغير من
محاولات لمحو وطمس الهوية المصرية وصورة الفلاح أبن
الأرض فيقول :-

" بيقولوا خلاص صورته بقت تايهه عن ولاده

تقولش ولاده مش منه "

وفى نهاية المطاف يلح الشاعر علي إبراز صفات
البطل / شندويل وكلماته التي أصبحت مثلاً يحتذى
به وحكمة استشفها المصري الأصيل مما دار حوله
من أحداث .

قال الأصيل شندويل واسمع كلام قانه

مهما الليالي تطول الشمس طالعانه

يفضح عيونها النهار اللي غريب عنه

ونورها يحرم علي اللي الضلمه رأس ماله

فاتتربيع الذى اعتمد عليه لإظهار العتب والحكمة
المستمدة من خبرات الحياة وتعامله معها فى جميع
الظروف مؤلمة ومفرحة . فهو إنسان يعيش معنا بشحمة
ولحمه يشعر بما نشعر به ، صريح القول ذو جذور ممتدة
حضاريا منذ سبعة آلاف سنة ، شاهده علي ذلك .

(دي رحلة عمري دواره سواقيها هناك سبعة)

ويؤكد علي ذلك من عراقاة الأصل وتحدي المحن ويبقي
(هو هيه وهيه هو ه) علاقة تمازج والتصاق بالأرض
التي عليها تربي وعاش وشرب من نيلها المتغلغل فى
شرايينه ، معبرا عن الذات المصرية الأصيلة فيقدمه صورة
لإنسان ينبض بالحياة مقررا حقيقته ونسبته وجنسيته بشكل
مباشر وصريح ...

أنا مصري .. ودى أرضي

وأيام الزمان عمري

وفاكريني ف يوم راح اتوه

ويعتبر " مأمون كامل " نموذجا متفردا من كتاب شعر
العامية فى مصر، وواحدا من الأصوات المتفردة فى هذا
المجال النابع من الأرض المنتجة غزيرة الانتاج لكنه على
العكس فى ذلك فقد عكف على هذه القصيدة التي عرف بها
ولازمته واشتهر بها ، مما استهوته وحدت من قدراته
وجعلته يدور فى فلكها مما حد من انتاجه الشعري ، ولو
تخلص من أسر هذه القصيدة لأختلف الوضع بالنسبة له
وأصبح شاعرا يخشى منه فى الساحات الأدبية ، وانتج
نصوصا شعرية تفوق هذا النص الذى حد من حركته ،
ولكن ليس كل ما يتمناه المرء يدركه .

وتبقى شندويل نموذجا متفردا للفلاح المصري المتمسك
بأرضه باذلا الجهد والعرق ممثلة لرحلة الحياة للإنسان
الطيب الأصيل وهو الشاعر نفسه .

وتمثل قصائد ديوان (حكاية شندويل) للشاعر مأمون
كامل تجربة متعددة الزوايا هدفها الأساسي إظهار المعن
المصري العريق فى هيئه نغمات صاعدة وهابطة للحن

واحد ، عذب النغمات يصنع سيمفونية شعبية ذات ملامح
نابعة من البيئة المصرية ، منذ البداية حين يعرف الشاعر
نفسه ..

" الأسم مأمون ع الكلام

والأب طول عمره كامل "

ومن هنا ندرك أننا أمام " كتاب مفتوح " وتجربة متغلغلة
فى الخصوصية لشاعر تربى وجدانه وتفتحت موهبته على
موروثه الشعبي وسماعه للمداحين وشعراء السيرة الهلالية
فى صعيد مصر الذى قضى فيه فترة من حياته تركت أثرها
عليه بالإضافة لكونه فلاح بن فلاح نشأ وترعرع فى إحدى
قري الشرقية ومنها استقى قاموس مفرداته اللغوية التى
شكلت عالمه الشعري واتخذ من شندويل الفلاح المصري
نموذجاً لذاته .

إبراهيم عطيه

الرقازيق ٢ يناير ٢٠٠٠

کتاب مفتوح

الاسم
مأمون ع الكلام
والأب
طول عمره كامل
والمهنة
بنعد في أرقام
ونصينا منها المهامل
عنواني
حارة القوت لأموت
من شارع الرزق الحلال
نصرة خمسة
زي حلمي
فسروه برغيف مدور
كل همي

مالتقيش الطعم ذل
والبلد كفر الشقا
كفر اللي عمره ما قال لغيره
ف يوم مافيش
كفر اللي خيره كتير يدور
ما يلاقيش
كفر اللي لازم كل واحد فيه
يطاطى
عشان يعيش ...

* * *

بيتي حب

أنا ليه بيت
عنوانه بين باقي البيوت شمس ف سما
شارع ملان بالهمهمه
فى مدينة واسعة .. إنما
فيها النبات
أنا قلبى بيت
وبانيه بهمس محبتي
سابع شريكة رحلتي
وأولادي وأمي وصحبتى
وأبويا وأخواتي البنات
أنا حبي بيت
ضلة علي محل الجيران
ساعة يتوه منا الأمان
تلقانا لمة كلنا ... ما يهمنا

مين اللي خد .. ؟ مين إللي هات .. ؟!

وأنا من هنا

بنده علي كل الخلايق - يا خلق هوه

الحب ليه حتضيعوه

من غيره فين نلقي الدفا

يبقي الوفا

هوه غرام ست البنات

تحلى عين سيد الرجال

بيجو العيال

والحب بيت

* * *

حسبہ تائید

عندي سته م العيال
تيجو يا ولاد الحلال
نحسب الحسبه اللي غلبت
حسبة الست اللي قالت
عندي بيضه أكيد ح تفقس فرخة
ح تبيض بيض كثير
كل بيضة ح تبقي فرخة
الفراخ يكثر عددها
المهم
أطلع السوق اللي جارنا
وبتمنهم أجيب وأجيب
عجلة حمرا بقوره بيضه
تكبر العجله عشر
تولد العجله

تجيبلي عجله ثانيه
عجله ثالثه
يبقي عندي عجول كثير
أشتري من خيرها أرض وبيت
وأتعشي بفطير
عندي سته م العيال
كل بنت وكل واد ياخذ فطيرة
عندي سته م العيال
كل بنت وكل واد ابنيه بيت
بعد ما رجليه تشيله
والمرتب
زي بيضة ستنا
لسه من لحظه يا دوب
واخده ناقص م الخزينه
كنت يوم اتنين ... ثلاثه

ف شهر فات
خدت م الصراف تلاته جنيه
عشان الواد مريض
واللي باقى م المرتب
تيجو نحسب
البقاله ... والجزاره ... والإيجار
والفلوس السلفه م الأسطي إبراهيم
واللي باقى م المرتب تيجو نحسب
عندي سته م العيال
وأمهم
قاعده مستنيه عايزه وعايظه كسوه
م اللي باقى م المرتب
تيجو نحسب
دا المرتب زي بيضة ستنا

كل يوم تطلع نجيبها فى الميعاد
نلقى سته م العيال
هات يا ضرب فى بعضهم
كل واحد قاصده يلهفها بنارها
يسد بيها ركن معدة
تملي فاضي
تصرح المسكينه
بس يا واد ... يا بت
تتفحص البيضة طازه
تحت رجلين اللي يسبق
والمرتب زي بيضة ستنا ...

* * *

مکان زمان

كان زمان
فاكره واحنا صغيرين
والحصان الحلم طين
والعروسه والعريس
والشجر كان الونيس
وأدي أمي
وأدي أمك فرحانين
وأدي أبوكي بالشرف
يحلف يمين

* * *

كان زمان
فاكره واحنا صغيرين
ضحكنا كان النهار
والليالي
غنوه فرحه
والأمل حنه وطرحه
والتهاني في كل دار
والقلوب تحرس قلوبنا الفرحانيين

* * *

كان زمان
فاكره واحنا صغيرين
فاكره لما العمده جالكم
قال لأبوكي
لم بتتك
والجيران قالو له عيب
مش كده تجوزها لابنك
يومها قولتى
ابن عمده يقول عروستى
والفرح بان فى العيون الغدارين
كان زمان ... كان زمان

* * *

بلمبي وأنا

كل شئ فى نشوة اتهد
سور العمده
بيت الوالده
هيبة الجده وهيبة الجد
قوله يابا
قوله يامه
لقمه هنيه بطعم الود
كل شئ فى نشوة اتهد
قعدة الشجرة
لمة العشرة
جوا قلوبهم خير ماله حد
حقي وحقق
حبي وحبك
ضاعوا ف يوم ما تفرق الحد

كل شئ فى نشوة اتهد.

بلدى

جبل المر

سينما تغر

كيس فلوس ف الحلم يخر

وأنا

ماشى أجر ف رجليه

بلدي

سكر ... جنان

والكاس مليون

أوهام ... حرمان

هلوسه دهوسه علي كل أمان

وأنا

لازم أقول والقول ليه
بلدي
الريح اتسخ
الواطي انتفخ
الزمه براح
العرض مباح
الكل عبيد .. الهف لقمة
بلدي ... نشوة
سكانها ناس م الفلاحين
طول عمرهم
كان همهم
اللقمة تعمر بطنهم
الهدمه تستر جلدهم
الحيطه تسند ظهرهم بعد التعب

زمان ... زمان
والحب نشوة
الحب كان قوت للشقا
الود كان طعم للقا
البسمه كانت توصلك قبل السلام
زمان زمان والقول لنشوة
كنتي الجنينه وخيرها زايد
كل اللي عايز كان بياخد
كنا نلقي الكل واحد
فى الفرايح
فى الترايح
فى الشدايد
هى نشوة جراها إيه
نشوه فين يا أهل نشوة ؟ !!!

* * *

شباب الورق

خسارتك يا ورد
علي سلم الرجل في الزقازيق
كده ع الطريق
تسيب الحدود وتسكن مشنه
ومسكاك ف ايدها
صبيه ... عجوزه
تقول رد جوزه
وعايزه تبيعك كده لاي حد

* * *

خسارتك يا ورد
وهانت جدورك
وأرضك عليك
وضاع من ايديك

دلالك وشوكك
وحتى اللي لسه يدور عليك
يلاقيك بتسأل
شحيح الموده
ويا ريته ود
تعالى يا وردي
تنور مكانك
تعمرف حوضك
تبص بحنينك
يمينك
شمالك
تشوف ايه يعوزك
وبس أوعي تنسي

أساسك متين
وميه وطنين
ووريني مين
كريم مهما يدبل
ورичته تشد
تعالى يا وردى
دى أرضك محبه
ودارك عمار
تساع كل همك
تساع كل جار
ومهما الديار
حتعلا وتعلا
جدارك ما جار
وايه بس ذنبه
لو البنا هد
خسارتك يا ورد

مَعَا يَقُولُوا

وقالوا الزمان
ومن آدم لحد الآن
ولسه ياما هيقلولوا
وطول م الدنيا عمرانه
وفيه ناس وحب جديد
يغنوا له
يقولوا عن حبيب يغدر
يقولوا عن حبيب هاجر
يقولوا عن حبيب يوفي
وحبيب ويا الزمان داير
وأنا حبي اللي عمره يوم
يدوبك يوم
موريني الهنا بطوله

ولسه ياما هيقلوا
صحيت الصبح علي صوته
حبيب بيقوللي أنا مشتاق
وحطيت شوقي علي شوقه
بقينا قبله للعشاق
نعلمهم ... نوريهم يحبوا إزاي
ننيمهم ... نصحيهم علي صوت ناى
بيحكي كل أفراحنا
بيشكي م اللي يجرحنا
بيبكي ع اللي حبه مال
وكان نفسه يكون رحلة
وجاني الليل لقيت نفسي
حبيبي بعيد وأنا وحدي
وقلت نصيبي ودا قدرني

وخذت العهد علي قلبي
لا يوم أشكي ولا أبكي
كفايه أعيش علي ذكرى
لا كانت قلبي ولا بعدي
ومالي ومال كلام الناس
يقولوا مهما هيقلوا
دنا حبي اللي عمره يوم
يدوبك يوم
أخذ مني الهنا بطوله
ولسه ياما هيقلوا ...

* * *

شنة

ف لحظة موت

ولحظة صمت

بص بعينه ع الدنيا وكان صابر

تقولشي أبوه يوم ما سماه

قال له عليك بالصبر طريق

صبر علي بز الجاره

يديه ساعات وساعات ينكر

ما خطفش م الموت بز أمه

صبر علي ذل اللقمه

كرباج مكهرب ضهر أبوه

خلاه ما هوش فاضي يضمه

صبر علي كل ما ف عمره

رحلة طويله وكان صابر

بدايتها شنته فوق لكتاف
آخرتها شنته ع الكتاف
بين البدايه وآخرتها
ياما كان ساعات وساعات بيجوع
ياما داق مرارة الفرح دموع
ياما قدر يخلقها شموع
شمعة شهادته وكله تمام
شمعة جوازته من أم حسام
شمعة حسام وأخته دنيا
دنيا مكملهاش صابر ...

* * *

بصو یحیٰ

جدو ... جدو ... جدو
جدو يحبنا
دائما نلقي عنده
حاجات حلوه لنا
كل يوم نروحله
يقابلنا بابتسامه
ولما نيجي نمشي
يقول مع السلامه
نضحك يضحك معانا
نجري يجري وانا
ويسوق القطر ونركب
ولما ف مره يتعب
يرتاح فى حضننا
جدو راجل يحير

ويانا يبغي صغير
ويلعب المساكه
والحراميه والعسكر
مع غيرنا يبغي مكشر
إن حد غيرنا دايقه
يقعد يشخط وينطر
وحلاوته لما يصلي
ويعلمنا نصلي
وبعدين يدعي لنا
جدو بيقول لاما
تعاملنا بالحنان
وكمان بيقول لبابا
يحمينا من الزمان
جدو يفرح لنا

لو شافنا فرحانين
يزعل منا يخاصمنا
لو كنا غلطانين
نجري عليه ونصالحه
نلعب شويه ف شعره
يضحك وياخدنا ف حضنه
ويبوسنا فى خدنا
جدو يا جدو يا جدو
يا حبيبنا كلنا

* * *

قبل الزمان بزمان

يا صاحبي يا إنسان
عاش في أي زمان
ساكن في أي مكان
عائزك وبندھلك
جنبي وأنا جنبك
أيدي علي أيدك
حلمي أكيد حلمك
مصري يمد الايد
للي قريب وبعيد
قبل الزمان بزمان ...

* * *

يا صاحبي يا إنسان
عايزك بمضمونك
مهما يكون لونك
د الحق موش عايز
قولي ولا قولك
مصري يعيش النور
ف الحق قلبه جسور
د الحق م الديان

* * *

يا صاحبي يا إنسان
عايزك ضمير صافي
صاحي ومتعافي
ناسي وموش فاكر
فاكر ومش ناسي
مصري يحب الخير
لولاده زي الغير
والحب عنده ايمان
يا صاحبي يا إنسان

* * *

ضربة معلم

والله وضربت ضربة معلم
خليت نهارنا لأملنا سلم
ياما حبايب لنا وقراب
هانوا وهنا لما افترقنا
جتنا بكلمه والكلمه حكمه
وبقيناه له وعزوا لنا سلم
ياما فقيرنا خاف من قادرنا
وخفنا بكره ليروح لغيرنا
جتنا بفكرة اللقمة حره
وبقيناه عشره وبكره سلم
عايش تخطط خايف لنغلط

كل اللي شاغلك مصير ولادنا
طبعك تشاور تقدر تحاور
ونلاقي رأيك هو اللي أسلم
والله وضربت ضربة معلم

* * *



طو الكلام

حلوا الكلام والأحلي منه لو يفهموا
حلوا السلام علي بعضنا بنقسمه
ضلتنا راية مصر فوق
وبكره بينا وبينه شوق
والرب حارس في علاه
واحننا ما بينا نحكمه
سيدنا المسيح طلب الأمان
ولقاه في مصر وحضنها
وأدي المسار شاهد علي اللي
في يوم هينكر فضلها
وأدي التاريخ بيقول يا ناس
تعالوا شوفوا واشهدوا

مسلم مسيحي ف مصر ايد ف الأيد
ويا ما شيدوا

والنيل بيروي العطشانين

م القبط أو م المسلمين

ضلتنا راية مصر فوق

وبكره بينا وبينه شوق

والرب حارس فى علاه

واحنا ما بينا نحكمه

سيدنا النبي قال من زمان

علي شعب مصر ده متحد

ف الحرب فيه أشجع رجال

ف السلم ليل ونهار يكد

طول عمره ييحب الحياة
حلوه الحياه فى نظرتة
يوصل نهاره لمنتهاه
ولا مره تاهت خطوته
والنيل بيروي العطشانيين
م القبط أو م المسلمين
ضلتنا راية مصر فوق
وبكره بينا وبينه شوق
والرب حارس فى علاه
واحنا ما بينا نحكمه
يا دنيا شرق وغرب قومي
تعالوا شوفوا واشهدوا

دا مسيحي وكنيسته براح
مسلم وحر ف مسجده
والمدنة جنب البرج حى علي الصلاة يا مؤمنين
ولكل واحد سكته
سبحانه من قال دين ودين
والنيل بيروي العطشانين
م القبط أو م المسلمين
ضلتنا رايه مصر فوق
وبكرة بينا وبينه شوق
والرب حارس فى علاه
واحنا ما بينا نحكمه

حكاية شندويل

نسمع حكاية جدع فلاح ۞ نق أرضه
أرضه كمان عشقته حافظت علي عرضه
والعشق بينهم يا ليل علي عين مخليهم
لتنين تشوفهم تقول واحد عشق نفسه
هي دي قصة حكاية (شندويل)
شندويل ده أصله واحد
من ولاد آدم ييشقي
والغريبة
الشقا كان باختياره
فوق ما إنه ظروفه صعبه عشان يعيش
بتقوله يتعب
هوه م ستكفاش بحمله
هوه ما ستكفاش بداره

من نهاره
والعطا فنه وکاره
دا العطا عنده حياه
دا العطا عنده صلاه
من نهاره هو مخلوق لجل يدي
حتى لو كان بالعطا هيزيد شقاه
والشقا كان باختياره
والعطا فنه وکاره

* * *

اسم الأصيل شندويل
بيته بساط أخضر
عنوانه بين البيوت عايق بيتمخطر
وحكايته بين الحكاوي

عمدة الحكايات
تسمعها تعرف صحيح مين اللي يتقدر

* * *

شندويل ... اسم معروف من زمان
اتولد ويا الزمان
ف المكان ... نفس المكان
بص من حواليه لقي نفسه لوحده
بص من حواليه لقي أرضه وفاسه
قال مفيش إلا الشقا زاد للطريق
مش عشانه
شندويل بيحب غيره
شندويل يدي جرانه
والجيران ... جار يدي جار
والبداية شندويل
اللي كان قادر يعيش من غير شقا

والشقا كان باختياره

والعطا فنه وكاره

والناس معادن يا عين ولكل معدن ناس

مين اللي قال الصفيح يلمع ويصبح ماس

مين اللي قال الذهب لو ف التراب يرخص

مين اللي قال الأصيل هيجيله يوم ينداس

* * *

شندويل ده معدنه وتركييته تبهر

معدنه ف الليل بيلمع

عمر ما الضلمة تطول تاه فيها نوره

ف النهار باين ملعلع

شمس يدي النور ولو جواه مولع

واللي يققع

إن فيه ناس قال بتطمع
قال ح تاخذ يوم مكانه
قال ح تلغي شندويل
شندويل الدار اساسها يشيل جبال
شندويل الأرض خيرها يوم ما زال
شندويل الأيد ببتحدي المحال
شندويل النفس تصبر صبر جوه
شندويل تسأل
تلاقي الأصل هوه
شندويل الود نبض ف قلبه جوه
شندويل الثورة بعد سكوت تدمر
اللي حتى ف يوم يفكر
أنه يخدش يوم جداره
والشقا كان باختياره

والعطا فنه وکاره

* * *

ييجي الزمان ويروح
وآدي شندويل هواه
الشوره شورته وصوته جاي من جواه
فيه اللي يمشي يمين
واللي شمال يمشي
وهوه رجليه تروح مطرح م يرسى هواه
شندويل الأصل ثابت
والرياح حواليه تصفر
يوم تهدى ... يوم تعفر
يوم تجيب زاد للسفينة
يوم تجيله قال ترجع شندويل
والأصل ثابت والرياح

عمرها ما هي واخده منه

عمرها ما هي جايبه ليه

غير بكيفه واللي عايزه

والسؤال !!!

ايه اللي عايزه

دا الشقا كان باختياره

والعطا فنه وكاره

* * *



أرضي يا رحلة حياه

بدايتها كان طينك

آخرها فيكي أندفن

واصبح أنا طينك

ندرن عليه يا غاليه

بعد الحساب لارجع
أرويكي ثاني عرق
واسمع مواويلك
شندويل دا ان كنتوا عايزين تعرفوه
شوفوا أرضه هتشفوه
هوه هيه
هيه هوه
شاب أسمر لونه من لونها ببيرق
خاصه لما عرق جبينه
ويا مايتها ببزعق
ضى شمس قمرها صافي
هوه هيه
هيه هوه
طوله فارع طول شجرها

يملا عينك لو بتعشق
قلبه أبيض قلبها دايمًا بقدره ربه ينطق
سره غامض سرها
ياما رب الكون يخلق
صبره يحكي صبرها
ع الحبة تهديها الطريق
هو هيه
هيه هو
لو ضحك تضحك خضار
لو يقول تنطق عمار
لو غضب تطرح دمار
لو شقي تفرح وتزعق ف الديار
قوموا شوفوا شندويل
إبني

لا همه حر يوم ولا برد ليل
يضرب الفاس تحت رجله
تخلي عرقه حب ييشاور عليه
حب بيخلي شقاه موال يخلي نفسه تشتاق للشقا
والشقا كان باختياره
والعطا فنه وكاره

* * *

أرضي يا عود الريحان بروايحه فواحه
أرضي يا قوت الزمان زراعته طراحه
ولاده زين الرجال يسقي الشقا مواويل
ومهما يتعب يقول بعد التعب راحه
في عز شمس الصيف في عز ليل الشتا
شندويل بيقول يا ليل
في عز شمس الصيف في عز ليل الشتا



لما تلاغيه أرضه
بيروح لها بقلبه
ميهمهوش تعب
يركب علي مسعود
ويهزه هزة عود
والساقية تصبح ناي
يحدى الطنبور

والميه جوه الشقوق يسمعها بتزغرد
والعود صلاة النبي زي الشجر ممدود
والعين بتتحدى مهما تشوف الدود
تنده أبو قردان

والأيد تحط الشتايل والبذور إيمان
والكل لحظة رضا رغم الشقا تخليك
لو يوم تحس الهنا كل المنى تعيشها

شوف قد ايه الشقا فى شندويل الحان
شوف قد ايه الشقا عنده غنا وموال

* * *

عاشق وعشقي ما بين الفاس وحصوايه
الفاس تلط الحصى اسمعها غنوايه
زغروده جوه القلوب تطرح بشاير خير
يقرب لعيني الأمل ضله وفلايه

* * *



وبيقولوا خلاص صورته
بقت تايهه عن ولاده
تقولشي ولاده موش منه
وقال طالعه لغة جديده
تقول للخلق فين هوه
شوف البلوه
كأنه ما كان
ولا كانت ف يوم فاسه تجيب الخير لأهل الخير
وتفحت للغريب قبره
وله يختار
يا أما يدوب ويلبس توب ما هوش توبه
يا اما يموت ويطويه التراب تحته
مش يغير شندويل
هوه معقول شندويل يوم نسي نفسه

طب ده لو يوم ينسى نفسه
أرضه تصرخ فيه تقولله
لا يا أبني أنت نبضي حته مني
أنت وحدك بس تعرف إيه ناقصني
أنت عهدي أفضل أدي
وأنت تتعلم وتدي
أنت ترويني بشقاك
شندويل يا جدر ثابت
عود بيضحك ع الهوي
ما يهمناش لو يوم يهزك أو عاندني
أوعي ييجي اليوم تسبني
دانت لو يوم تنسي نفسك
راح تلاقي جتي حصوي
تحت رجلك نار بتفني خطوتك ويا الغريب

ياللي غرامك أنا وغرامي هو أنتي
ياللي القدر قال لنا نشقي أنا وانتي
نتعب ما نطلب ثواب إلا من الخلاق
سبحانه خلا الشقا ليه وليك ترياق
يا جنة دنيا ودين والحلم هو أنتي

* * *

شندويل يضرب بعينه يلقي أرضه حاضنه رجله
زي ما بتحضن نباتها حضن يديله الحياه
شندويل يشتد عوده باللي ساندده وبهواه
أصل أرضه هيه حبه
موش عشان ما هيه قوته
موش عشان ما هيه زاد أم العيال
موش عشان ما هيه لقمه لكل عيل لأ دا أكثر
حبه ليها أعم وأشمل

عاش معها العمر كله من نهار ما صار وكان
رحلة الليل والنار كتفها ف كتفه حنان
عز عرقه يديهولها يحصده ضل وأمان
يقسم الفرحة معها تكرم تديه نصيبها
في الشدايد شده ضهره
همها تحافظ عليه
تحرسه من ذل غيرها
دا الشقا كان بختياره
والعطا فنه وكاره

* * *

قال الأصيل شندويل واسمع كلام قاله
مهما الليالي تطول الشمس طالعه له
تفضح عيونها النهار اللي غريب عنه
ونورها يحرم علي اللي الضلمه رأس ماله

* * *

شندويل يقول كده دوغري صريح القول
مفیش داعي عشان نغمز ولا نهمس
مفیش لا لف ولا دوران
وطول عمري وأنا عایش زمانی بلیله ونهاره
دي رحلة عمري دواره سواقيها هناك سبعة
هنا طالعہ علیا شمس نواره
لا يوم غابت ولا مره تلین لجان
وطول عمري وأنا عایش زمانی بلیله ونهاره
يجيني الليل يلاقيني ما فيش ضلمه
أنا نوري ف جوايا موريني
يجيني الليل يلاقيني مفیش ساقعه
أنا نبضي ومن قلبي مدفيني
يجيني الليل يلاقيني مفیش غربه

أنا عارف طريقي ورسمه أنا بايدي
يجيني الليل يلاقيني ما فيش توهان
وطول عمري وأنا عايش زمانى بلبه ونهاره
يجيني النور يزيد نوري
م دام الأصل من عندي
وطول عمري وأنا عايش علي عندي
علي عنفى أهم وأسير
علي عنفى اسبيه يطير
ويدخل دايرة النسيان
بعيد عني
أنا مصري ... ودي أرضي
وأيام الزمان عمري
وفاكرني ف يوم راح أتوه

* * *

التعريف بالشاعر

- مأمون كامل مأمون .
- مواليد قرية نشوي - مركز الزقازيق - شرقية في ٢٣ مايو ١٩٤٠ .
- يعمل بالتربية والتعليم .
- شارك في العديد من المؤتمرات الإقليمية والأدبية في مصر .
- نشرت قصائده في الصحف والمجلات المصرية وأذيعت بالإذاعة المصرية .
- عضو النادي الأدبي بقصر ثقافة الزقازيق .
- أحد الشعراء البارزين في النشاط الأدبي ومشاركاً للجميع بحرصه الدائم علي تواصل الأجيال .

الفهرس

٧	شندويل رحلة حياة	١ -
٢١	كتاب مفتوح	٢ -
٢٥	بيني حب	٣ -
٢٩	حسبه تايهه	٤ -
٣٥	كان زمان	٥ -
٣٩	بلدي وأنا	٦ -
٤٥	شباب الورد	٧ -
٤٩	مهما يقولوا	٨ -
٥٣	شنطه	٩ -
٥٧	جدو يحبنا	١٠ -
٦١	قبل الزمان بزمان	١١ -
٦٥	ضربة معلم	١٢ -
٦٩	حلو الكلام	١٣ -
٧٤	حكاية شندويل	١٤ -

إصدارات السلسلة

١ -	حكاية شندويل	شعر
	مأمون كامل	

تحت الطبع

١ -	ابتسامات صغيرة وقصائد أخرى	شعر
	بدر بدير	
٢ -	الحلم في زمن الذئاب	مسرحية شعرية
	ثمر الشناوي	
٣ -	وأدركت منة الصباح	قصص للأطفال
	محمد فاروق مصطفى	
٤ -	مناجاة عاشق	شعر
	المجلى على المجلى	

رقم الإيداع بدار الكتب

٢٠٠٠/٤٥٩٩

الترقيم الدولي I.S.B.N.

977-324-047-9

دار الإسلام للطباعة والنشر

٠٥٠/٣٥٠٤٥٣